

**Date – 30/05/2025**

**Time - 7:30 -7:40Hrs**

**AKASHVANI AIZAWL**

**REGIONAL NEWS BULLETIN**

**HEADLINES (MORNING)**

1. Aizawl District Magistrate chuan a ni 2 na vawiin hian zirna in te a khar chhunzawm.
2. Mizoram Universal Health Care Scheme hnuiai damlo zai ngai, nghah ngai te zingah a duh an awm chuan phai lama refer theih an nih thu Mizoram Health Care Society chuan hriattirna a chhuah.
3. Union Agriculture and Farmers Welfare Minister Shivraj Singh Chouhan chaun nimin khan rampum huapa loneitute tana hmalakna Viksit Krishi Sankalp Abhiyan a hawng.
4. Prime Minister Narendra Modia chuan nimin khan Patnaa Jayaprakash Nararayan International Patna Airport terminal building thar a hawng.

<><><>

**WEATHER ALERT**

Nimin atangin Mizoramah ruah chhum lo chat lova a sur avangin, Aizawl District Magistrate chuan a ni 2 na vawiin hian zirna in te a khar chhunzawm.

Akashvani zawhna chhangin Aizawl Meteorological Centre Director Pu Sudheer Kumar Dwivedi chuan Mamit, Kolasib leh Lawnglai district-ah te thlir leh ruah a na zual tura an hmuh thu leh district dang zawngah pawh ruah tam tak a sur theih thu a sawi a. Mipuite chu fimkhur tura chahin ina awm tam tur leh pawn chhuak tam lo turin a chah a ni.

Pu Dwivedi chuan Mamit, Kolasib, Saitual leh Khawzawl district ah ruah tam tak sur theia an hmuh thu a sawi bawk a ni.

Byte of Pu Sudheer Kumar Dwivedi

Hemi chungchangah hian District Magistrate te chuan thuchhuah siamin mipuite fimkhur turin an chah a, lei laih lai neite tan, leimin a thlen loh nan hnathawh zawhah uluk taka khuh hul tur a ni a. Tukverh leh kawngkhar nghet taka khar tur a ni a. Mahni ram chhung leimin hlauhawm awm te a ram neitu ten an khuh hul tur a ni a. Inchung rangva thli lak mai theih te thawm that tur a ni.

Thli leh ruah thawh laiin electric khawl zawng zawng OFF vek tur a ni a. Lirthei motor reng reng garage ah him taka 'park' tur a ni a. Mahni in leh lo

chhuahsan tur a ni lo a; inchhungah tawm him tur a ni a, chiai tur a ni lo. Tuihawk luankawr bul hnaiah kal loh tur a ni. Thli leh ruah thawh lain lui ah leh lui hnaiah ah tumah kal loh tur a ni a.

Khuarel chhiatna a lo thlen in mahni bialtu Zonal Officer te hnenah chhiatna thlen thu hriattir tur a ni a, engemaw vanga biak tlang theih loh an nih chuan Link Zonal Officer ah te hian report tur a ni.

<><><>

## MIZO TERRITORIAL ARMY

Mizo Territorial Army dinna tura hmalakna kal mekah an awmna lai tur hmung thlan fel a la ni lova, reiloteah tihfel a nih an beisei tih Coordination & Land Search Committee Chairman Lt. Col. Clement Lalhmingthanga, MLA chuan a sawi.

Pu Clement Lalhmingthanga sawi danin, Mizo Territorial Army awmna tur hian khaw hrang hrangin anmahni khuaa awm tura rawtna sorkarah an thlen a leh VC te pawh an inphal viau a, amaherawhchu New Delhi-a zin Chief Minister rawn haw hunah a tul anga ngaihtuah zui zel an tum thu leh tun dinhmunah chuan a hmung tur sawichian theih an la nei lo a ti.

Pu Clement Lalhmingthanga chuan recruitment rally an neih hun tur pawh June thla an ruahman naa a la chiang lo a ti a, Mizo Territorial Army recruitment chungchangah a dil thei te graduate nih a ngai tia thu lo tidarh an awm chu a thudik lo a nih thu a sawi a. Hei hi chu India ram pum huapa officer exam tur te tan a nih thu leh an lo hriatpawl nia a hriat thu a sawi a. Mizo Territorial Army ah chuan pawl 10 chinin an dil theih dawn thu a sawi a ni.

Kan corr report lo ngaithla ang.

### VC

*Sorkar laipui atanga phalna an hmuh angin Mizoram sorkar chuan Mizo Territorial Army company pahnih din turin hma a la mek a. Tun thla ni 16 khan Mizoram Sorkar hnuia Mizo Territorial Army chungchang thil pawimwah hrang hrang ngaihtuah tura din, Coordination & Land Search Committee hmasa ber chu an Chairman Lt. Col. Clement Lalhmingthanga, MLA hovin an thukhawm a. An thutkhawmah hian Territorial Army Company hnih-te temporary a an lo awmna tur, Aizawl leh Lungleiah hmung zawngin ruahmanna siam ni se tiin an rel a. Mizo Territorial Army-ah Mizo thalaite an luh theihna turin ruahmanna hrang hrangte lo kalpui turin Mizoram Youth Commission beisei a nih thu leh a tul angin Sainik Welfare & Resettlement nen hma lo la se tiin an rel bawk a ni.*

<><><>

## MUHCS

Mizoram Universal Health Care Scheme (MUHCS) hnuia damlo zai ngai tur, nghah ngai te zingah a duh an awm chuan phai lama refer theih an nih thu Mizoram Health Care Society chuan hriattirna a chhuah.

An thuchhuaha tarlan a nih danin, Aizawl Civil Hospital leh Zoram Medical College & Hospital-ah te zaitur zai hmabak tam tak awmin, rei tak nghah te angai tih hriat a ni a. Hemi avang hian damlo zai ngaite a hma thei anga zai an nih theih nan leh an inenkawlna dawn tur tih khawtlai a nih zel loh nan beneficiary te'n an duh anih chuan phai lamah refer theih a ni.

Kan corr thudawn danin, tun thlengin Mizoram Universal Health Care Scheme (MUHCS) hnuia inziaklut mi 10,514 in he hamthatna hi an hmang tangkai tawh a. Mizoram State Health Care Society CEO Dr Biakthansangi chuan online-a MUHCS in ziahluh theihna an hawn atangin darkar 24 chhungin mi 17 an inziaklut tawh a ti a. Phai lama refer pawh an thahnem tawh hle tih sawiin vawiin thlenga refer tawh zat chu mi 637 an nih thu a sawi.

Dr Biakthansangi chuan April ni 1 atanga damlo inenkawl tawh zawng zawng te bill an pekchhuah tawh zat chu cheng vbc 6 nuai 65 sing 1 sang 7 za 9 35 a nih thu a sawi a. Sorkar hospital-ah mi 9465 in MUHCS hi hmang tawhin heng zinga 8071 chu damdawiin chhuahsan tawh an ni a ti a, 1394 chu enkawl mek an nih thu a sawi a. MUHCS hnuia nimin thlenga Private hospital inziaklut tawh pakuaah damlo 1049 in MUHCS an hmang tawh a, an zinga 901 chu damdawiin chhuahsan tawh an ni a, 148 chu damdawiina awm mek an ni.

Dr Biakthansangi chuan Health Care Scheme hlui zawk bill an hnenah a la luh reng thu sawiin vawiin thlenga bill ba an la neih zat chu cheng vbc 2 leh nuai 96 a nih thu a sawi a. Hei hi damlo te damdawiin atanga an chhuah hnu leh a then phaiah te kala an haw hnuah an rawn thehluh te a ni a, an tihfel thuai dawn thu a sawi a ni.

Mizoram Universal Health Care Scheme ah awlsam takin mahni in lum atanga inziahluh theih reng a nih tawh thu Dr. Biakthansangi chuan a sawi a, mipuite chu inziaklut zel turin a sawm a ni.

<><><>

#### AIR NEWS ON SOCIAL MEDIA

Chanchinhar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinhar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinhar puan leh a ni ang.

<><><>

## **VIKSIT KRISHI SANKALP ABHIYAN**

Union Agriculture and Farmers Welfare Minister Shivraj Singh Chouhan chaun nimin khan rampum huapa loneitute tana hmalakna Viksit Krishi Sankalp Abhiyan chu Odisha-a Puri district chhunga Sakhigopal atangin a hawng. Union Minister chuan he beihpui thlak tur hian loneitute leh Scientist te inkarah thawhhona tha a siam dawn tih a sawi a. Scientist ten an thil zir leh thiamna neihte loneitute an hrilh ang a, harsatna tam tak chinfel theih a ni ang a ti a. Scientist 16,000 chuang pawl hrang hranga siamin thingtlang khua te an fang dawn a. Ni 15 campaign chhungin state 20 tuam hman tum a ni.

<><><>

## **VKSA**

Rampum huapa tunlai hmanrua leh thiamna hmanga loneitute puihna tura hmalakna - Viksit Krishi Sankalp Abhiyan (VKSA) hi nimin khan Mizoram District hrang hrangah hawn a ni a,

Hnahthial leh Lunglei district tan Hnahthial DC pisa kawtah Addl. DC, Pu Zothanmawia Khiangte chuan a hawng a, India ramin tharchhuah ngah mah se hmun, hun leh tha sen ral chhut chuan tharchhuah a tlem hle a ni a ti a. Thawh mila thlai thar chhuah tihtam a nih theih nan tunlai thiamna nen a loneitute ziritirna pek chu campaign thil tum a ni a ti.

VKSA hian Lunglei leh Hnahthial District chhunga khaw 99 te a huam dawn a ni.

'Lawngtlai District - tan Chawnhu Multipurpose Community Centre-ah Vikshit Krishi Sankalp Abhiyan ( Pre- Kharif Campaign) hi hawn a ni a,Campaign kalpui chhung hian Agriculture leh a kaihhnawih Department ten technology tha leh changtlung tak tak an neihte an puangzar ang.

Serchhip District-ah chuan DC Pu Paul L.Khuma'n a hawng a. Agriculture, Horticulture, Fisheries, AH&Vety, Soil & Water Conservation, Rural Development, Irrigation leh Sericulture Department atangin official te he programme ah hian an tel an tel a. Loneitute hriatna leh thiamna tizau tur te leh an department kaltlanga scheme hrang hrang awm mek te an chhawr tangkai theihna turin thupui thlan bik hmangin heng Department aiawh te hian loneitute zirtirna hun an hmang a ni.

Kolasib ah pawh Kolasib DC Pu Robert C. Lalhmangaihan a hawng a, VKSA hnuaia Campaign turte hi Team pathum ah in then in, Team tin te hian ni khatah khaw pathum zel tlawh in, kuthnathawkute hnenah hlawk zawka thlai thar dan tur an mamawh ang zelin an zirtir ang. Campaign hi vawiinah tan in, thla thar June ni 12 ah Kolasib District chhunga khaw 60 ah Campaign hi zawh hman tum ani.

Khawzawl ah chuan Zaingen YMA Hall-ah Vikshit Krishi Sankalp Abhiyan (VKSA) hawnna hun hman a ni a, Khawzawl Bawrhsap Pu K. Vanlalthiana'n a hawng a ni.

Saitual-ah chuan District Bawrhsap Dr. Lalngura Tlau in he campaign hi a hawng a, Saitual District chu Zone thum - Saitual zone, Ngopa zone leh Phullen

zone ah te then niin, heng zone-ah theuh te hian he campaign hi kalpui a ni dawn a ni, a ti.

<><><>

## **PRIME MINISTER**

Prime Minister Narendra Modia chuan nimin khan Patnaa Jayaprakash Nararayan International Patna Airport terminal building thar a hawng. Hei bakah hian Prime Minister Modia hian Bihta Airport thar cheng vaibelchhe 1410-a dinna tur lungphum a phum nghal bawk a. Hawnna inkhawmah hian Governor Arif Mohammad Khan, Chief Minister Nitish Kumar, Civil Aviation Minister K. Ram Mohan Naidu te an tel a ni.

Hemi hnu hian Pu Modia hian km ruka thui kawngzawh a nei zui nghal a. Mipui tam takin an lo lawm a ni..

<><><>

## **DELEGATES**

Sawrkar laipui tirh NCP (SCP) hruiatu Supriya Sule kaihruai Parliamentary delegates te chuan Africa ram hrang hrang tlawh kualin India-in firfiaka chetna a duhloh zia an puangzar a. Supriya Sule-I leh a hote hian African National Congress Secretary General Fikile Mbalula hmuin firfiaka chetna lakah India ngaihdan an sawipui a. Pu Mbalula chuan thuchhuah siamin South Africa chuan firfiaka chetna do kawngah India a thlawp tlat dawn tih a sawi.

BJP MP Ravi Shankar Prasad-a kaihruai All Party Parliamentary delegate-te chuan nimin khan Rome khawpuiah Italy Foreign Affairs and Defence Committee President Stefania Craxi an hmu a. Firfiaka chetna nuai bo tura rawtna bakah India-in firfiakte a do dan hrang hrangte an sawipui a ni. He team-a tel ve Union Minister hlui MJ Akbar chuan Akashvani zawhna chhangin Pakistan-in kum 1947 atangin firfiakte a chawm tawh tih a sawi a. A damkhawchhuahna hmanrua atan Pakistan chuan firfiakte a hmang tangkai a ni a ti bawk.

<><><>